

PREDGOVOR

Bosna i Hercegovina je pretežno ruralna zemlja. Razlika između urbanih i ruralnih područja je izražena zbog dugogodišnjeg zapostavljanja nerazvijenih područja. Dalji napredak Bosne i Hercegovine će zavisiti od ulaganja u društvenu i ekonomsku infrastrukturu ruralnih područja.

Međutim, uvijek se postavlja pitanje finansiranja ruralnog razvoja u svrhu postizanja opšteg boljitka.

Bosni i Hercegovini se nude različite mogućnosti finansiranja ruralnog razvoja. Izbor se sužava činjenicom da ruralni razvoj ne može podnijeti visoku kamatnu stopu i da su početno potrebna velika ulaganja u razvoj infrastrukture i nabavku savremene tehnologije. Šanse, koje su Bosni i Hercegovini pružene putem pretpristupnih fondova Evropske unije su djelimično iskorištene, a buduće fondove će biti sve teže dobiti, uglavnom zbog administrativnih ograničenja i ograničenja vezanih za standarde kvaliteta i sigurnosti proizvoda.

U ovoj monografiji su prikazani novi modeli finansiranja ruralnog razvoja koji su temeljeni na domaćim izvorima. U monografiji se analizira i mogućnost finansiranja ruralnog razvoja putem štednje građana i kroz emisiju ruralnih obveznica, koje su garantovane od strane države.

Istraživanja ove vrste su potrebna, posebno u uslovima kada Bosna i Hercegovina, kao potencijalni kandidat za članstvo u Evropskoj uniji, mora ispuniti određene ekonomske, pravne i političke uslove. Jedan od tih uslova je i harmonizacija poljoprivrednog sektora, kao strateškog sektora Bosne i Hercegovine sa zakonodavstvom i realnošću Evropske unije.

Ovo istraživanje može koristiti određenim ciljnim grupama, prvenstveno akterima koji su uključeni u ruralni razvoj i koheziju ruralnog razvoja sa njegovim razvojem u Evropskoj uniji.

Temelj za pisanje ove monografije je doktorska disertacija Autora, kao i brojni radovi iz oblasti ruralnog razvoja i finansiranja, te internet izvori koji obrađuju aktuelnosti vezane za temu.

U Banjoj Luci, 2021.godine

Autor